

ETH DIARI

Numerò 93
Dijaus 29 d'abriu 1999

HUELHETON

DIARI

D'ARAN

Prètz: 50 pessetes

VUK DRASKOVIC EI DESTITUSIT PES SUES DECLARACIONS



Eth viceprimèr ministre iogoslau, eth liberau Vuk Draskovic, siguec destituit ager peth primèr ministre, Momir Bulatovic, segontes era television estatau sèrbia

Era destitucion siguec justificada pes recentes declaracions enes quaus er antic líder opositor demanaue un acòrd qu'arture es bombardaments dera OTAN contra Iogoslàvia e permete eth desplegament de tropes dera ONU en Kosòvo.

"Tamb es sutes declaracions publicques contràries ara postura deth Govèrn, damnatgèc era reputacion deth Govèrn", segontes ditz eth comunicat difonut peth Ministèri federau d'Informacion.

Draskovic entrèc a èster part deth Govèrn federau iogoslau eth passat 21 de gèr amassa tamb d'auti membres deth sòn Moviment Sèrbi de Renauçion (SPO), en tot anonciar que sajarie de "mielhorar era imatge internacionau" de Iogoslàvia, guastada peth regim socialista de Slobodan Milosevic.

Es tres darrèri dies en cargue de viceprimèr ministre, Vuk Draskovic aufric nombroses entrevistes e dues ròdes de premsa enes quaus insistie qu'exprimie era opinion de Milosevic en favor d'un acòrd entà detier es bombardaments dera OTAN, emprinciadi eth 24 de març passat.


"Creigui... auer exprimit eth plaçament de

Milosevic e deth Govèrn", didec Draskovic, dobtant en insistir, eth passat deluns, que Belgrad ei conscient deth besonh de desplegar en Kosòvo ua fòrça militara internacionau jos era bandèra dera ONU.

Milosevic non reaccionèc tad aguestes paraules coma tanpòc ac auie hèt dempús qu'er emissari rus entà Kosòvo, Viktor Chernomirdin, tanben afirmèsse qu'eth president iogoslau ère dispausat a acceptar era preséncia de fòrces militares estrangères en aquera conflictiua region.

Peth sòn cant, representanti deth Ministèri iogoslau d'Exteriors reiterèren que Belgrad sonque pòt acceptar er escampilhament d'observadors internacionaus non armadi, en tot excludir es des païsi membres dera OTAN qu'an bombardat Iogoslàvia.

Draskovic auie convocat ua ròda de premsa ena sedença deth sòn partit.



NAUA ONADA DE KOSOVARS EN ALBÀNIA

Es refugiadi albano-kosovars torren a arribar tà Albània. Dimars pera net, ues dues mil persones crotzèren eth lòc fronterèr de Morina. Se tracte deth grop mès nombrós d'ença hè lèu dètz dies, quan eth fluxe se copèc de patac deishant veir es temors sus era sòrt qu'auien corrut es que demorauen en aute costat dera termièra.

Un còp mès, es refugiadi recent arribadi dèren testimonni d'atrocitats. Fòrça òmes aueren estat obligadi pes fòrces sèrbies a baishar des tractors. Asseguren qu'eth darrèr viatge que les vederen èren estienudi en solèr.

Albània acuelh ja mès de tres cents cinquanta mil refugiadi.

AJUDEM ETH PÒBLE DE KOSÒVO

CAMPANHA D'ARREMASSADA DE MATERIAU D'URGÈNCIA ENTÀS REFUGIATS KOSOVARS

Òli de *girasol*
Legums sequi
Lèit en povàs
Cacao en povàs
Sucre
Sabon en pastilha
Chucs de fruta en *tetra brik*

Fruts sequi
Lèit infantil en povàs
Hariats (*papillas*)
Compreses
Borrasetes (*pañales*)
Pasta de sopa

En LES e BOSSÒST, enes parcs de Pompièrs deth 21 d'abriu enquiath 7 de mai, de 18.00 enquias 21.00 ores.

En VIELHA, en carrèr Sarriulèra, 12 (baishi), ath cant dera oficina de torisme. Botigues de comestibles e supermercats junhuts ara campanha. Deth 21 d'abriu enquiath 15 de mai, des 16.30 enquias 19.30 ores.

Compde corrent:
2100 0679 16 0200470241 CIEMEN Acció Solidària
0182 2370 46 0010022227 Crèu Ròja (Victimes Iogoslàvia)

Non sonque auem de besonh es tòns sòs, senon tanben eth tònn trabalh, eth tònn temps e era tua illusion.

**Telefona-mos
tath 973 64 01 10 o 973 64 18 01**

ES CRIADORS DE SHIVAUS DERA CERDANHA DEMANEN AJUDES

Es criadors de shivaus de raça ispano-bretona dera Cerdanha demanaràn ua linha d'ajudes entà hèr tèsta ath mau moment que passe eth sector. Haràn arribar formaument es sutes reivindicacions tara Generalitat de Catalonha e tath Ministèri d'Agricultura.

Es mès de 100 ramaders dera Cerdanha se planhen qu'enquia non hè guaire recebien ua subvencion deth Ministèri d'Agricultura. Rebremen qu'es shivaus son "un regulador plan important entàs montanhes e prats dera comarca".

ETH DIARI

amplie es sòns productes editoriaus e a de besonh incorporar mès personau.

CERCAM

periodistes *free-lance* ; correctors e comerciaus.

Trucatatz entà entrevista, pes tardes ath telefon 973 64 17 72

Organize: Ajuntament de Vielha-Mijaran
Collabòre: Conselh Generau d'Aran

Donc a jo, quan siga gran, m'agradaria èster critic perque son ues persones que sonque son criticades pes madeishi que son objècte des sues critiques, çò qu'anulle era validitat des madeishes. Ben, non sai pas se s'enten mès qu'ei realement atau. Un critic pòt criticar e açò a d'èster plan salutós tar estomac, ja que se pòden trèir era 'mala lua' deth dessús cargant sus quïnsevolh tèma e ath delà crubant. Fantastic.

I a critics de cinema, de television, literaris, de teatre, gastronomic e de moltes autes matèries e realement non è coneishut jamès cap de critic que siguèsse un figura dera matèria dera quau opine. Açò que hè maupensar, pr'amor que se ben se pòt hèr ua critica tecnica sus un determinat aspècte, normalament dan ua opinion plan personalizada e tamb pòc critèri tecnic. O non...?

Eth darrèr critic gastronomic qu'auí eth plaser de conéisher ère anorexic; sonque minjaue mongeta trenda e lhuç borit. Incredible! Ei un prestigiós critic gastronomic d'un important diari tamb ua tirada superiora as 100.000 exemplars. Realement a d'èster plan dificil poder jutjar se ua saussa ei ben emulsionada sense provà-la o ben decidir eth punt de coccion d'un longuet de bò en tot minjar lhuç borit e, çò de mès dificil qu'a d'èster erabarra d'escruec e demorar que quauquarès s'ac creigue.

Ath delà, beu aigua. Tanben è de díder, en aunor ara vertat, que i a critics gastronomic que non s'identifiquen enquia dempús de pagar era nòta e açò ja me semble mès seriós. Perque, que me'n didetz de quan un senhor critic gastronomic ei ath madeish temps eth propietari dera guida que publique? Qui avalòre eth sòn trabalh? A on ei eth

negòci? Perque, non mos enganham, en aquest cas non cromptam guides gastronomic ne tà Sant Jòrdi.

Es mès divertits son es critics de television; deuen auer catorze o quinze televisors dolhadi ath madeish temps en salon de casa. Quin *quirigall*! E s'ath delà an mainadèra qu'a d'èster un vertadèr spectacle vedé-les saiant d'escotar tamb esperit critic un programa d'aguesti tant boni de *prime time*.

M'imagini era escena; eth nòste amic critic Sr. Josep concentrat en un programa leugèr d'en *Sanchezdragó* e seguint ath madeish temps era 'griella' des autes cadenes, era sua hemna tamb un *culebrón* catalano-venezolan, eth mainatge gran - propietari d'un des comandaments a distància - interessat en un reportatge d'animaus sauvatges dera China meridional, era mainada tamb un vidèu d'un cors

d'anglés perque deman a examèn, eth mainatge petit jògue tamb era Nintendo en ua auta tele, era mair-grana vò veir a Miguel Bosé, mès com que non se i ve guaire s'a plaçat tamb eth nas a un pam dera tele; eth pair-gran un partit deth Mondiau sub-21 qu'ei plan interessant; e era vesia deth cincau se garde era Rocio *Jurásico* tamb eth volume a ueit cents decibèls.

Er espectacle qu'a d'èster dantesc; eth Sr. Josep a de patir quauqua sòrta d'alteracion nerviosa perque aquest bombardèg d'imatges, son, colors, movements e d'au-ti non l'aguante ne un cèc. Ara qu'entengui que cruben entà hèr aquest trabalh, e jo encara i tròbi a faltar era CNN en anglés pr'amor que maugrat non l'entengues tròbi que quède plan ben.

Miquel Campà



ES CORBILHONETS, DE VIATGE UN AUTE CÒP

Ua associacion, sigue deth tipe que sigue, un viatge assolidada se convertís en un lòc de trobada de mès en mès familiar, acuelhedor, de realizacion e enriquiment collectiu e tanben individuau. Quan s'ei capable de conservar aqueri interèssi comuns intactes, en tot desbrembar es mali moments, es discussions e saber èster tolerants damb toti, arriben es satisfaccions de sabé-se pertanhent a un grop solid e dubèrt e damb vocacion de futur. Un futur que non pòt èster en lòc mès qu'ena esperança enes nòsti mainatges e mainades. Ja hè quate ans qu'Es Corbilhonets se'n van de viatge tà conéisher un shinhau de mon, tà con-viuer amassa pendent dus dies e tà hèr dera Associacion Es Corbilhuèrs de Les ua bona forma de hèr pòble, de hèr cultura, d'aprèner es uns des auti e d'auer un punt de referéncia cultural, musicau e lingüistic plan important en aguesti dies que corren. Es dies 24 e 25 d'abriu an estat en Saragossa e en Monastier de Pèira. Eth prumèr an coneisher es alumnes d'ua es-còla a pròp de Barcelona. Tar an següent se n'anèren entà Pau e entà Oloron Sta. Maria, tà anar visitar ua calandreta o es-còla occitana, e est'an passat sigueren en Montserrat. Ua trentia de mainatges e mainades semblen

fòrça mainatges, mès que cau díder que se saben comportar, que son curiosi e interessadi per tot çò que ven e escoten e que non an perdut bric era capacitat de susprené-se e, çò qu'ei mès important: a nosati, es mès grani, mos retornen aquera capacitat de suspresa qu'a viatges, o mès lèu soent, perdem e non artemhem a trobar. Damb era mainadèra tostemp qu'as causes a condar: un cromptèc ues lunetes de non-arren a un venedor de color ena plaça deth Pilar e li dèc a cambi toti es sòs que portaue. Mès tard, e dempús de hè-li a comprèner que li auien prenut eth peu, eth nòste petit amic li venec es lunetes der ahèr a un des acompanyants en tot sajar de hèr bèth shinhau de negòci. Non s'impressionèren guaire damb era granor dera basilica, mès òc que les cridèc era atencion qu'eth pilar o colona que li da nòm lo portèsse era Vèrge des de Jerusalèm, segontes conde era tradicion e toti demanauen s'a on ère era Vèrge pr'amor que, de tant petita, lèu non la vedien. Es dues bombes dera Guèrra Civi penjades en un mur deth temple e que non arribèren a esclatar les heren a barar eth cap per se se despenjauen e hègen eth pet. Ena Alfajeria entrèrem sonque en pati musulman e vederen es irangèrs e ues petites agulhes

enes arcades e murs. Tant ac demanèrem qu'ara fin calec preguntar ce tà qué èren. "Así evitamos que las palomas hagan sus necesidades en las paredes porque cuando se acercan se pinchan". Guarda se son espabilats per acitau! Ena botiga qu'entràuem hègen caisha. Toti cromptèren tà mama e tàs mames des mames era Vèrge de rigor. Quan arribè eth ser se cau hèr ara idia que de dromir ne parlà-ne! Tà qu'ac hèsqen se cau mèter seriós. Era aubèrja d'Allucant, ena Laguna de Gallocanta, deuèc demorar ben descansada quan mos vedec marchar. Eth parc deth Monastier de Pèira mos acuelhie a londeman en un dia solelhenc de primavera. Eth saut d'aigua coneishut coma Cola de caballo non lo desbrembaràn facilament. Tar an que ven tornaram a illusionà-les damb bèth viatge. Ath delà de cantar, dançar o tocar, èster d'Es Corbilhonets cau que sigue cada an com un sagèth commemoratiu d'aqueri que hèn colleccion. Es nòsti mainatges hèn colleccion de cançons en aranés, de dances, de nòtes d'acordeon e flaüta e, tanben e sustot, colleccionen rebrembes d'experiéncias viscudes amassa. Per molti ans ac pogam hèr!

Associacion Cultural
Es Corbilhuèrs de Les

Editor e director: Joan Ramon Colomines-Company.
e-mail: jrc@apdo.com
Informatica e dissenh: Marc Colomines i Nadal.
Equip de correctors: Pilar Barés e Xavier Gutierrez.
Equip comercial: Ramon Aguiló i Teixidor.
Impressor: Xerox's Document Center 220 ST d'ETH DIARI en Vielha.
Tirada: 1000 exemplars.
Edita ETH DIARI
Familia Colomines
Centre d'estudis VIVÈNCIA ARANESA
Aula Europa des Pireneus (Val d'Aran)
Carrer Doctor Mamel Vidal
locau num. 5
22300 Vielha de Val d'Aran
Telèfon: 073641777
Fax: 073640877
E-mail: vivenciaranessa@ctv.es